



Inatsisartunut ilaasortaq Justus Hansen, Demokraatit  
MAANI

## **Puisit amiisa pilerisaarutigineqarnerat pillugu Naalakkersuisunut apeqqutigineqartumut nr. 51-imut akissut**

Inatsisartut suleriaasissaanni § 37 imm. 1 naapertorlugu atisaliortarfinnut allanullu tamakkuninnga suliaqartunut puisit amiisa pilerisaarutigineqarnerat pillugu Naalakkersuisunut apeqquteqarputit. Apeqqutigineqartut uanga naalakkersuisoqarfinnut akisassanngortinneqarput.

### **1) Naalakkersuisut sunik suliniutinik pilersaaruteqarpat atisaliortarfinnut allanullu uagutsitulli puisip amiata atisatut mutinngoqqinnissaanut soqutiginnissinnaasunut puisip amia pilerisaarutiginiarlugu?**

1-imut) Naalakkersuisut § 37 nr. 251-imik akissuteqarnermittulli kissaatigaat pingaartumik erseqqissassallugu puisit amiisa tuniniagaanerat pillugu pilersaarutit iliuusissallu puisit amiinik suliffeqarfimmit Great Greenland A/S-imit (GG A/S-imit) suliarineqarsimmata.

Apeqqutigisatit akissavakka periusissatut pilersaarut GG A/S-ip siulersuisuinit ineriartortinneqarsimasoq tunngavigalugu aamma GG A/S apeqquteqarninnut atatillugu attaveqarfisimavarput.

GG A/S niueqatissarsiorluni sulissuteqartuarsinnarpoq aamma EU-mi taassumalu avataani puisit amiinik tuniniaavinni aallussisunut tamanut puisit amiinik tunisassiat pilersaarutigalugit.

Tassunga atatillugu suliffeqarfik ukiunut 2011-miit 2013-imut takorluukkat aamma pingaarnertut periusissatut pingaarnertullu suliassanik pilersitsisimavoq uani erseqqinnerusumik allaaserineqartuni "GG A/S tuniniaanermut atatillugu periusissatut pilersaarutaa 2011-2013" tassunga ilanngullugu:

#### **1. Tamanut pisariaqartitsisunut puisit ameerniartartutut sallerisaanissaq**

- Suliffeqarfimmiit suliffeqarfimmut (BtB) puisit ameerniartartutut pikkorinnerpaatut inissisimalernissaq (GG A/S takussaasariaqarpoq – naniuminartuulluni – eqqortunik akeqartitsilluni – tuniniaavinni – pitsaanerpaanik pisisitsinnaasoq)
- Tunisassiassat GG-p pisiniartunut neqeroortigisinnaasaasa pitsanngorsartuernerisigut
- Pisiniartunik attaveqarneq pisiniartunut ataasiakkaanut inummiit inummut pisartussanngorlugu (ilaatigut sinniisuulluni tuniniaasartoq namminerluunniit tuniniaasorisaq aqqutigalugit qanittumik attaveqarnissaq qulakkeerlugu)
- Nammineq ateq atorlugu allani tuniniagassanut uninngatitsivinnik tallimanik pilersitsinikkut (ilaatigut pisinianut takussaasuunissap qanittumi attaveqarnikkut qulakkeerqarneratigut)

27. feb 2012  
Sagsnr. 2012-061964  
Dok. Nr. 836522

Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apnn@nanoq.gl  
www.nanoq.gl

- Tuniniaanermut akisussaasoq GG A/S-imut atasussanngorlugu
- Tuniniaassussisartut immikkut tunitsivissanik ilisimasallit aqqutigalugit tuniniaanikkut
- Pisiniat pitsaanerpaamik kiffartuunneqartarnerisigut.

## **2. Tuniniaasartutsinnut niuertarfinnullu tuniniagassanik pitsaanerpaanik tunniussisarnissaq**

- Immikkoortunik aqutsinikkut (pisiassaq eqqortoq, aki eqqortoq, piffissaq eqqortoq, annertussutsit eqqortut)
- Uninngasuutinik aqutsinikkut (ilaatigut pisiniartartutta pingaarnertitatta tamatigut tunisassiornissamat piareersimanissaat isumannaarlugu – nioqutissanik piumaneqartunik tuniniaanissamat piareersimallutik).
- Nioqutissanik inissiisarnikkut
- Sunniiniarnernik aqutsinikkut.

## **3. Suleqatigisanut pingaarutilinnut suleqatikkuminartuulluni**

- Qulakkeerlugu GG A/S tamakkuninnga sulialinni pitsaanerpaanik niuernermut piunasaqaateqarnissaq
- Qulakkeerlugu GG A/S puisit amiinik pisiniarfigiumaneqarnerpaassasoq
- Kopenhagen Fur-ip saqqummersitsinerinut peqataasarnissaq.

## **4. Ilusilersuineramik mutiliornermillu ingerlatitseqqittarnermi ilisimasalittut suliffeqarfiussalluni pikkorissoq**

- GG A/S ineriartornermik aallartitsisartutut ingerlassaaq, ilaatigut atisalersoriaatsimi puisit amiisa atorineqarnissaat qulakkeerlugu
- GG A/S-imi tuniniaaneq nukittorsarlugu.

GG A/S maannakkut Kopenhagen Fur-imut taassumalu atisalianik ineriartortitsiviinut attaveqarnialerpoq, ineriartortitsineq aamma puisit amiinik erisaanillu atuilluni pisinnaaqqullugu. Taamatuttaaq GG A/S atisanik ilusilersuinermik ilinniarfinnik suleqateqarniarluni attaveqarpoq taamaalillutik taakku puisit amiinik erisaanillu periarfissanik aamma takunnissinnaaniassammata.

Kiisalu Kalaallit Nunaanni sumiiffinni atisanik ilusilersuisartut ilusilersuinermut attaveqatigiittarfissaat aallartinneqassaaq.

GG A/S aammattaq maani nunatsinni tunisat amerlisinniarlugit suliniuteqarpoq:

- Brugsenimi Pisiffimmilu amminik akikitsunik tuniniaanermigut,
- mersortarfinnut amminik akikitsunik tuniniaanermigut,
- Brugsenimut Pisiffimmullu pooqattanik atorussanillu tuniniaanermigut,
- Qarasaasiakkut pisiniartarfimmik pilersitsinermigut.

Pingaarnertut anguniagaavoq pisisartut qaninnerulernissaat taamatullu akigissaartitsinerulluni tunisassianik pitsaasunik tunisaqartalernissaq. Pingaarnertut periusissat tamakku sulissutigalugillu naammassisinnaajumallugit GG A/S-ip Naalakkersuisunit tapersersorneqarluni periarfissat tamaasa atorniarpai pisisartunut attaveqarnerit nukittorsarnerisigut,

pisartussaajunnartullu allat puisit amiisa nioqputigineqarnerannik suliaqartut attaveqarfigisarnerisigut.

Taamatuttaaqaq januar 2012-imi Kina-mi angalaqataavunga Kalaallit Nunaata, puisinniartarnitsinni ileqqutta puisillu amiisa tuniniagaanerata ilisimaneqarnerulernissaat anguniarlugu, Kalaallit Nunaannit angalaqatigiit Aalisarnermut, Piniarnermut Nunalerinermullu Naalackersuisoqarfimmeersut aamma GG A/S-imeersut taassumalu suleqatigisaa ilagalugit.

Kingullertut februaarimi GG A/S aamma KNAPK peqatigalugit EU Parlamentimut ilaasortamit Bruxellesimut qaaqqusaallunga, EU-mi puisit amiisa eqquteqqusaannginnerisa Inuillu immikkut isigineqarnerisa Kalaallit Nunaannut sunniutaasa tusarniaassutigineqarnerannut peqataavunga. Tamanna ataatsimoortumik EU-mi Inuit immikkut pineqarnerat pillugu annertunerusumik paasititsiniaanissamut suleqatigiissuteqarnissamik inerreqarpoq.

Angalanermi tassani Danmarkimi GG A/S-ip 2012-imut atisanik tuniniagai *Isaksen Design*-imit suliarineqarsimasut Copenhagen Fashion Week-imi qaangiuteqqammersumi takutitsivinni arlalinni saqqummersinneqartut takuakka. Takusinnaasattut Naalackersuisut puisinit tunisassiatta nittarsanneqarnerannut periarfissat tamaasa atortarpaat.

Inussiarnersumik inuulluaqqusillunga

Ane Hansen